



Centraal Bureau voor de Statistiek

Fort Amsterdam z/n

Tel.: 461 1031

Fax: 461 1696

E-mail: info@cbs.cw

www.cbs.cw

KOMUNIKADO DI PRENSA

Willemstad, 15 di yüni 2016

CBS ta presentá resultadonan di enkuesta di Koheshon Sosial 2015

Di 6 di novèmber 2015 pa 18 di yanüari 2016, Ofisina Sentral di Statistik (CBS) a tene e enkuesta di **Koheshon Sosial** (EKS) bou di 2620 kas di famia na Kòrsou.

Meta di e enkuesta akí tabata di haña un bista di e grado di solidaridat, enbolbimentu sosial i sentido di responsabilidat pa komunidad ku ta biba den pueblo di Kòrsou.

Ta promé bes ku CBS ta tene un enkuesta di Koheshon Sosial. E intenshon ta di haña un bista di kon ta pará ku diferente asuntu ku tin di aber ku koheshon sosial. Una bes ku tene algun EKS mas den futuro, CBS lo por kuminsá hasi afirmashon tokante ki desaroyo tin riba tereno di e diferente asuntunan investigá pa medio di e enkuesta akí.

Aki ta sigui e resultadonan prinsipal pa e diferente aspektonan:

- ***Bienestar suphetivo*** ta enserá kiko un hende mes ta opiná tokante su kalidat di bida. Pa midi esaki, ta opservá kon satisfecho e persona ta ku diferente área di su bida, manera su bida en general, su relashon ku e otro miembronan di su famia den kas i ku otro hende, su situashon finansiero, su trabou aktual i tambe demokrasia na Kòrsou.

E partisipantenan a indiká, a base di un sistema di eskala, kon satisfecho òf insatisfecho nan ta ku e áreanan di bida menshoná aki riba.

Un total di 89,2% di poblashon ta sea satisfecho òf hopi satisfecho ku nan relashon ku e otro miembranan di nan famia den kas.

- **Konfiansa ta enserá te kon leu un hende ta asumí ku un otro tin bon intenshon.** Un total di 32,0 porshento a duna di konosé ku nan ta total- òf parsialmente di akuerdo ku e afirmashon: ‘Bo por konfia mayoria di hende’. Konfiansa den instansia i organisashon ta na un nivel hopi abou. E instansianan ku hende tin mas konfiansa den dje ta iglesia (42,9%), polis (26,5%) i sistema di enseñansa (21,2%). Esunnan ku hende tin ménos konfiansa den dje ta e partidonan polítiko (2,3%), gobièrnu (3,8%) i parlamento (4,1%).
- **Partisipashon ta duna un bista di kon dispuesto hende ta pa tuma akshon. E áreanan ku a investigá den kuadro di e enkuesta akí ta: Partisipashon na merkado laboral, partisipashon den polítika i partisipashon sosial.** Un 57,3 porshento di poblashon a bisa ku nan ta aktivo riba merkado laboral i 42,7% porshento a bisa ku nan no ta aktivo. *No por compará e resultadonan di partisipashon laboral akí ku e sifranan di e Enkuesta di Forsa Laboral debí ku e biaha akí a usa un otro definishon i un otro método di kalkulashon.* Partisipashon polítiko: 25,8% di poblashon a duna di konosé ku nan ta sea interesá òf hopi interesá den polítika i 63,9% a duna di konosé ku, si tabatin elekshon mañan, nan lo a bai vota. Partisipashon sosial ta enserá te kon leu un persona ta tuma akshon, sea den sektor formal òf informal. E organisashon- òf aktivitatnan ku ta gosa di mas tantu partisipashon ta: organisashon religioso (22,1%), deporte i rekreo (20,0%) i enseñansa òf aktivitat kultural (14,8%).
- **Inklushon tin di aber ku te kon leu hende ta sinti ku komunitatnan ta permití nan forma parti di dje i na mes momento ser nan mes.** Un manera pa midi inklushon ta di opservá kon hende ta reakshoná riba diferente afirmashon tokante e kondishonnan ku un hende mester kumpli kuné pa por bisa ku e ta un ‘Yu di Kòrsou’. Un total di 80,9 porshento a duna di konosé ku nan ta total- òf parsialmente di akuerdo ku e afirmashon, ‘un Yu di Kòrsou mester a nase aki’, i 81,1% ta total- òf parsialmente di akuerdo ku ‘un Yu di Kòrsou mester por papia papiamentu sin problema’.
- **Mobilidat sosial tin di aber ku subida òf bahada di individuo òf grupo di un posishon sosioekonómiko pa otro, di un generashon pa otro.** Na e pregunta, ‘Kon bo ta pensa ku bo posishon sosial na Kòrsou lo ta aki tres pa kwater aña’, gran mayoria di poblashon (91,8%) a kontestá ku nan situashon lo sea keda meskos òf drecha.
- **Enbolbimentu sosial ta keda manifestá den relashon sosial ku hende ku ta den bo ambiente.** Generalmente, hende tin un opinion bastante positivo tokante koheshon den nan propio barío. Loke e habitantenan ta sinti nan mas

responsabel p'e ta pa kos kana nèchi den nan bario (82,6) i pa nan tin bon kontakto ku bisiaña (77,5%).

- *Norma i balor tin di aber ku regla ku ta bisa kiko tin mag i kiko no tin mag, i ki tipo di kos ta bale la pena aspirá p'e den bida.*

Un 41,0% di poblashon ta opiná ku ta eksistí norma masha kla tokante kiko ta bon i kiko ta malu, i ku e normanan ei ta konta semper i pa tur hende, sin importá ki sirkunstansia nan ta aden.

Por último

Riba página inisial di wèpsait di CBS (www.cbs.cw), bo por download henter e dokumento den kua e resultatonan ta publiká.

Pronto nos lo saka publikashon mas completo, ku anáalisis mas profundo. Den Modus, e revista statístiko di CBS, tambe lo sali artíkulonon riba e tema akí.

CBS ta gradisí tur famia ku a kontribuí na éksito di e enkuesta akí.

////////////////////////////////////